

麗
體
金
膏
二

麗體金膏

(二)

馬俊良輯

叢書集成

初編

主編者
王雲五

商務印書館發行

國朝麗體金膏卷五

拜颺集

浙省五十年緩征

浙省再緩征

豫省展賑

東省展賑

安徽展賑

東省緩征

閩省蠲緩

嘉義縣義民謝恩

重宴鹿鳴

耕藉優敘

耕藉賞花翎

梁國治

梁國治

胡季堂

嵇璜

劉塘

藍

福康安

譚尙忠

蔣賜棨

蔣賜棨

謝賞四庫總纂綴正等

多羅質郡王

謝賞鹿肉

畢沅

紫禁城騎馬謝摺

彭元瑞

賜雙眼花翎謝摺

于敏中

敍賞四庫提調纂修謝摺

親王

欽賜福字鹿肉等謝摺

賞貂皮褂謝摺

御賜壽額佛像如意冠服朝珠荷包

孫士毅

賞內城房屋謝摺

孫士毅

恩命協辦謝摺

彭元瑞

賞黑狐端罩謝摺

彭元瑞

擢授光祿寺卿謝摺

陸錫熊

賞穿黃馬褂謝摺

畢沅

補禮部右侍郎謝摺

朱珪

恩諭照尙書請封謝摺

彭元瑞

恩賞母氏緞貂謝摺

姚棻

賞內城房屋謝摺

彭元瑞

紫禁城內騎馬謝摺

李綬

原銜充日講起居注謝摺

彭紹觀

賞廓爾喀貢象馬詩墨刻謝摺

親王

浙省五十年緩征

大學士臣梁國治等謹奏爲恭謝天恩事。乾隆五十年十月初十日內閣奉上諭。福崧奏仁和等十七州縣並杭嚴嘉湖二衛田畝歉收。請將應徵漕米錢糧等項分別緩徵等語。本年浙西一帶雨澤愆期。田禾間有被旱之處。收成不無歉薄。民力未免拮据。所有仁和、錢塘、海寧、餘杭、臨安、嘉興、秀水、海鹽、於潛、石門、桐鄉、烏程、歸安、長興、德清、武康、安吉等十七州縣並杭嚴嘉湖二衛歉收田畝應徵地漕錢糧著加恩緩至五十一年麥熟後徵收。其漕米及舊漕截等銀亦著緩至次年秋成後徵收。新舊帶運以紓民力。該部卽遵諭行。欽此。欽惟我皇上德隆幃幕。化浹藹敷。卽田功於斗粟寸絲。所其無逸。播休徵於五風十雨。乃亦有秋。間逢郡縣偏災。定沐恩施。曲逮蠲輸給種。於春夏早厘秋成。截漕賑饑。由堯豫遞推淮甸。維茲浙

右禾興魚米之鄉。偶少雨膏。歲歉滯遺之利。仰荷皇慈廣被。詔命覃敷。核十七屬而均霑。偕新舊徵而並緩。三時望歲。帝知稼穡之艱。百室棲糧。民免追呼之擾。水澇旱乾。不爲患。雖歉收如遇豐登。布縷粟米皆無徵。惟損上乃能益下。秋風高廩。田歌總浙水東西。夜火新春。鼓腹遍茅簷士女。雨珠雨玉。信聖人之如天。多黍多稌。維君子之有穀。臣等近依禁階。早奉綸音。謀稻粱于田間。供依惟正。沐恩波於天上。申錫無疆。昨歲餘糧。猶記巡軒之賜復。今茲納稼。重蒙旰食之咨饑。想白粲盈家。依然豫大豐亨之象。計丹綸到日。莫罄衢歌巷舞之歡。愿八埏共慶金穰。如百穀常流膏雨。惟四時長調玉燭。冀來年早獻嘉禾。所有臣等感激微忱云云。

浙省再緩征

大學士臣梁國治等謹奏。爲恭謝天恩事。乾隆五十一年正月初三日。內閣奉上諭。上年浙西杭嘉湖三府屬之仁和等十七州縣。並杭嚴嘉湖二衛。得雨較遲。收成歉薄。業經降旨將應徵地丁漕項銀米。緩至次年分別帶徵。以紓民力。第念今春東作方興。農民播種翻犁。未免尙形拮据。著再加恩。將杭嘉湖三府屬之仁和、錢塘、海寧、餘杭、臨安、於潛、嘉興、秀水、海鹽、石門、桐鄉、烏程、歸安、長興、德清、武康、安吉等十七州縣。並杭嚴嘉湖二衛。再行緩徵。至秋收後。按例徵收。並查明實在貧民。酌借口糧籽種。以資接濟。等因。欽此。欽惟我皇上詔禧錫羨。壽寓延洪。調玉燭於當陽。獻歲而日方紀丙。肇金穰於祈穀。迎郊而春叶由庚。

爰布令於元辰。載頒恩於九省。鄉稱魚稻。旱乾時偶遇歉收。歲免租庸。東西浙旣霑殊渥。而迺宵衣旰食。青陽則早厪春犁。蒼葉杏花。繡陌則羣催農扈。憫饔殮之不繼。按口輸糧。知稼穡之維艱。釐民給種。想含哺而擊壤。八政爲先。當荷鍾其成雲。三時不失。紓民力莫非帝力。仰一人以食農人。處處棲糧。鳧茨悉棄。聲聲布穀。種桂分擎。八口數口之家。比屋而歡騰土鉏。干耦維耦之衆。新畬則秀遍秧鍼。奏庶艱食。君子之民皆有穀。誕降嘉種。聖人之澤本如天。臣等身被龍光。面承鳳綽。計農書之協至。行慶萬方。瞻睿藻之裁成。先春二日。男耕女饁。迎釐遍於垓瀛。巷舞衢謠。載德竊維桑梓。聽田間之告語。郡有嘉禾。溯上天之恩波。湖眞明聖。雨暘燠寒。各以敍。當新年共祝萬年。麻麥菽粟無不登。願大有長書九有。所有臣等感激下悃。謹合詞繕摺。恭謝天恩。伏祈聖鑒。謹奏。

豫省展賑

臣胡臣蔣跪奏爲恭謝天恩事。本月初六日。內閣奉上諭。豫省開封衛輝等屬。頻歲不登。上年入春後雨澤愆期。麥收失望。夏秋雖經得雨。田禾究未免歉薄。業經節次降旨。蠲賑頻施。閭閻口食有資。不致復虞失所。惟是積歉災區。元氣未能驟復。今春青黃不接之時。農民生計。未免尙形拮据。著再加恩。將被旱較重之汲縣等五屬極貧下戶。於今春賞給兩月口糧。其被旱稍輕之延津等九屬極貧下戶。賞給一月口糧。至秋災較重之歸德府屬四屬。無論極次貧民。俱著展賑兩個月。其秋災稍輕之歸德彰德府屬。無論

極次貧民俱著展賑一個月。再開封等府州屬上年雖勘不成災。而秋成止有五分。現屆青黃不接。如有拮据貧民。亦著酌借口糧接濟。以待麥秋等因。欽此。欽惟我皇上壽宇熙春。惠心孚吉。啓青陽而錫羨辰。擇初辛。臚繡甸。以綏豐申。頒令甲。維中州穀宜五種值。春月序屬三陽。租庸賜復。數百萬帑藏繼蠲。儲峙籌民。億兆姓盈寧有賴。數溫綸於昨歲。久濃黍雨之膏。告穰兆於去冬。渥被穀糈之積。固已香傳餅餌。盈疇鋪碧綠之交。猶厘戶有困倉充。黼裕青黃之接。合廿六屬而皆徧。戶版分稽。酌一兩月以有加。賑糈各給。炊皆溢甑。喜齊登春日之臺。廩許借糧。都飽喫豐年之飯。恩波深洽。偕河潤以孔長。闔澤旁流。共淮源而俱遠。德會八方之風雨。心周萬戶之饗餐。政在養民。福用敷庶。先七日爲人。八日爲穀。皇之四海如春。樂含哺而嬉。鼓腹而遊。地在九州曰豫。臣等身隨輦草。誼切鄉枌。盍韶祉於王春。一人有慶。卜農祥於樂歲。百穀用成。寄語西疇。共勤春作。犁興之候。雖依北闕。如棲晨炊。稻熟之香。感極銘心。歡陳果腹。幸海宇長遊仁壽。祝釐同嵩少之山。願來牟早獻登豐。書瑞遍淇園之竹。所有臣等感激下忱。謹合詞繕云。

東省展賑謝恩

奏爲恭謝天恩事。乾隆五十一年正月初六日。內閣奉上諭。上年山東兗曹濟寧等府州屬雨澤愆期。被旱成災。業經降旨。賑卹緩徵。俾窮黎口食有資。不致失所。第念今春正賑已畢。青黃不接之時。仍恐民食

不免拮据。著再加恩將被災七八分之極次貧民。於例賑外再展賑一月。以濟民食。其六分災之貧民。及勘不成災之德州等二十九州縣。並坐落衛地。著該撫查明實在無力農民。酌借一月口糧。以資接濟。至該省散賑需出米石甚多。卽勘不成災各州縣。亦需借糶兼行。所有截留南漕二十萬一千餘石。尙恐不敷給發。又豆石一項。亦爲民間口食所必需。著再加恩將東省本年應運通米豆儘數截留。該撫務飭所屬實力妥辦。以副朕軫念窮黎恩加無已之至意。該部卽遵諭行。欽此。欽惟我皇上治洽昌辰。恩覃壽寓。迎韶布令。芸生涵木德之仁。錫福綏和。粒食裕茅簷之樂。澤下尺而苗上尺。芳塍正潤。乎祥翼。乾大生而坤廣生。淑節卽邀夫閭閻。惟東省雨愆。昨歲致西疇穫遜豐年。正賦積逋。早荷徵收之迫。緩盈倉億庾。更蒙恩賚之鴻龐。茲逢綺序初開。綸言特賁。俾饔飮以共給。秋冬春已閱三時。念饁餉之或艱。上中下恐虛二鬴。用優賑卹均霑之例。加賜新陳交接之時。惠鬯甘霖。期增浹月。凡被災七八分以上。悉計口而授餐。及其餘廿九屬之多。並順時以貸粟。當此春臺日麗。戶盈白粲之藏。佇聞夏隴風香。穗觀黃雲之茂。千餘里歡聲洋溢。長占時雨時暘。萬斯年景祐綿延。益慶餘三餘九。臣等身叨祿糈。誼切鄉枌。沐聖澤之頻滋。膏霑青壤。際春祺之溥錫。詔沛丹霄。合朝野以臚懽。願書大有而歲多黍。秬先耆童以洽喜。惟祝洪禔而算衍京垓。所有臣等感激下忱。謹合詞具摺。恭謝天恩。仰祈聖鑒。謹奏。

安徽展賑

大學士臣稽璜等跪奏。爲恭謝天恩事。乾隆五十一年正月初三日。內閣奉。上諭。上年安徽亳州蒙城等州縣雨澤愆期。被旱成災。業經降旨賑卹蠲緩。俾窮黎口食有資。不致失所。第念今春正賑已畢。青黃不接之時。民食恐不無拮据。著再加恩。將被災較重之亳州等十九州縣被災九十分貧民。無論極次。於正賑後。再行加賑一個月。此內亳州蒙城太和泗州盱眙天長五河宿州定遠靈璧等十州縣。均係積歉之區。著將被災八分極貧。加賑一個月。所有衛所饑民及貧生兵屬。並著一體加賑。其餘被災五六七八分貧民及勘不成災地方。有應行酌借口糧籽種。並減價平糶之處。著該撫察看情形。酌量辦理。至該省散賑需用銀兩甚多。除鳳陽蕪湖兩關本年應徵稅銀准其留用外。著戶部再於就近酌撥銀一百萬兩。照例解往。以備賑卹之用。再該省應解還江西截卸漕米價銀二十二萬餘兩。該省現在賑項不敷。此項銀兩無庸移解。著江西省將墊買米價作正開銷。等因。欽此。欽惟我皇上帝大德懋昭。湛恩普洽。裕利用厚生之至計。九垓同慶盈寧。推給求養欲之良規。億載長躋仁壽。五日風十日雨。方廣錫以春祺。千斯倉萬斯箱。乃特施夫闔澤。惟昨歲偶愆雨澤。致兩江稍歉田收。上厪聖懷。屢邀渥賜。追征而蠲正賦。給賑而發神倉。固已戶飫盤餐。儉歲無殊於樂歲。亦且雪滋隴麥。熙春共快乎逢春。詔啓青陽。恩頒丹詔。曠典用昭。逾格惠心。益驗有孚。俾江淮千里之民。暢草木羣生之樂。災黎八分九分以上。賑加一月兩月而贏。食陳可以接新。早慰籌車之祝。飽德何妨屬饜。倍形手足之寬。卽勘不成災。嘉種與口糧並給。更澤無弗被。寒儒

偕衛戶同霑。睿慮周詳。務極甘澍醴膏之大沛。民生熙皞。愈效歌衢擊壤之愚忱。臣等誼切桑榆。班趨鵷鷺。捧絲綸而洽喜。正際始和布令之初。先畎畝以騰歡。共徵大有書年之兆。惟有加無已。鞏鴻圖而景祐。彌延當與物同春。總壽寓而綏豐溥遍。所有臣等感激下忱。謹合詞繕摺。恭謝天恩。仰祈聖鑒。謹奏。

五十一年東省緩征

臣劉墉等謹奏。爲恭謝天恩事。乾隆五十一年四月十四日。奉上諭。明興奏濟南泰安東昌等屬。得雨未能深透。等因。欽此。欽惟我皇上德被垓埏。恩符蠲冒。茂時育物。溥天之闔豫方深。養欲給求。比戶之輸將恐後。當時雨時暘之候。乃猶厪念方隅。於餘三餘九之謀。務使偕滋至澤。維東省沃腴之壤。偶未透夫膏霖。致南訛長養之辰。遂稍騰夫穀價。帝心廣運。恩詔聿頒。凡九州縣民田。及各坐落衛地。逋仍存舊。稅緩貢新。悉安東作之勤。戒追呼以勿擾。概俟西成之稔。分露積而同徵。貽我來牟。私慶盈倉之玉粒。庠乃錢鏹。佇呈萬寶於金風。在昨歲福錫駢臻。咸樂饔飧之裕。矧此日惠孚元吉。益形俯仰之寬。臣等葵藿忱殷。桑粉誼切。捧絲綸之下賁。合海岱以騰歡。荷雨露之均霑。先耆童而洽喜。紆力而彌思。盡力預卜黍稷與稷翼之豐。厚生而更賜廣生。倍彰浹髓淪肌之效。薰風所被。五絃用播。夫虞琴化日方長。億載咸歌。夫軒紀。所有臣等感激下忱。謹合詞具摺。恭謝天恩。伏祈聖鑒。謹奏。

閩省蠲緩

禮部侍郎藍等謹奏爲恭謝天恩事。內閣奉上諭。臺灣辦理軍務。漳泉等府屬。應付浙粵滿漢官兵及四川湖南貴州各兵。兼之糧餉軍裝鉛藥等項。絡繹過境。差務甚繁。資用民力之處最多。茲屆春祺普錫之時。大功卽日告竣。自宜特沛殊恩。以示優卹。所有泉州漳州八縣本年應征錢糧。着加恩蠲免十分之三。其浦城等十二縣應征錢糧。着蠲免十分之二。福鼎等七縣所有應徵錢糧。着緩至五十四年麥熟後徵收。等因。欽此。欽惟我皇上仁周遐宇。惠洽羣生。建益安益治之宏謨。乾行不息。施引養引恬之實政。兌悅無疆。凡屬含齒戴髮之儔。生成各遂。越在瀕海負山之壤。樂利均沾。近以臺郡滋奸。致煩大兵遠勦。籌糧發帑。累不及乎閭閻。挽粟飛芻。誼略申於黎赤。迺蒙聖慈垂軫。念其奔走之微勞。疊邀溫旨遙頒。慮及輸將之竭蹶。軍營爰駐。旣全蠲穗結之徵。戎旅攸經。復遞減租庸之賦。荷殊施於綸綍。至再至三。慶餘積於倉箱。斯千斯萬。梟徒旣剪。懽聲隨凱奏以俱騰。蟻悃知恩。喜氣共春風而並暢。臣等職聯楓陛。誼切桑邦。合茅簷蔀屋。以摠情。傾葵共向。仰舜日堯天而飽德。結草難報。所有臣等感激下忱。謹合詞繕摺恭謝云云。

將軍臣福謹奏。爲據情代奏。恭謝天恩事。竊嘉義縣久被賊圍。義民等捐貲助餉。竭力堵禦。得以保固無虞。臣奉到節次褒獎義民。及蠲免錢糧恩旨。傳各義民首面爲宣諭。將諸羅縣改爲嘉義。縣俾閤縣良民。

倍加勸勵。該義民首等跪聆之下。感激涕零。詞色實爲真切。並據黃奠邦等呈稱。奠邦等籍隸臺灣。世居邊徼。百年生聚。荷敷澤之涵濡。四海恬熙。沐湛恩之汪濊。家安耕鑿。戶慶盈寧。不因物產豐饒。稍加科則。每以海疆遼遠。特沛恩膏。凡此負性含生。無不淪肌浹髓。詎有林爽文者。潛謀蟻聚。漸肆鴟張。少一句。憑陵巖邑。積薪未徙。原無曲突之謀。滋蔓難圖。遂有燎原之勢。閭邑居民。等人懷義憤。力挫兇鋒。皆思爲國捐生。不惜毀家紓難。四邱出甲。頓增組練之光。衆志成城。屹若金湯之固。乘障戍兵。已憊。久望援師。近郊賊壘。增多。難通讓道。重圍五月。應手而解。仰賴我皇上惠洽黎元。恩周海宇。共仰生成之大德。冀醇怙冒之深仁。如子弟之衛父兄。情難自己。況小民之親君上。分所宜然。乃蒙愷澤覃敷。恩綸下賁。特旌義舉。用錫嘉名。丹詔十行。永作愚氓之勸勵。天題兩字。寵逾華袞之褒榮。茲值賊燄潛消。欣覩王師大捷。掃妖氛于雷雨之夕。迅若風馳。拯危城於水火之中。驚從天降。乘勝而盡殲狐鼠。追奔而生縛鯨鯢。從此人慶更生。農皆安業。猶復切如傷之視。常賦頻蠲。共推獎善之心。微勞必錄。歡騰茆屋。感切葵衷。縱量瀛海之深。莫喻恩波之廣。惟有輯和鄰里。咸臻熙皞之庥。頌祝岡陵。永享昇平之福。敬陳蟻悃。叩謝鴻慈。等語。臣已逐加慰諭。允爲奏謝云云。

臣紀昀等謹奏。爲恭謝天恩事。內閣奉上諭。上年直隸保定河間天津順天等府屬各州縣。因夏秋雨水

較多。河流漲發。田禾被淹成災。節經降旨。銀米兼放。令該督實力撫卹。分別賑濟。小民自可不致失所。第念今春正賑已畢。青黃不接之時。民食恐不無拮据。着再加恩。將順天天津府屬二十一州縣成災七八分之極貧。並九分災之極次貧民。俱展賑一個月。以資接濟。其成災八分以下各州縣。及勘不成災地方。仍着該督察看情形。或酌借口糧籽種。或減價平糶。分別籌辦等因。欽此。欽惟我皇上仁育堯封。澤先禹甸。郊圻相接。近依日月之光華。游豫時經。每荷春秋之補助。儲蓄久裕。常贏於耕九耨三。豐歉無虞。寧計夫斗千斗百。盈虛有數。五星或異。其饑穰撫恤頻加。三輔同登。於仁壽。粵惟前歲。六七月暑雨偶多。致被餘波。廿二邑秋禾微損。飛章入告。當稷奏之方聞。溫綽先頒。遽堯咨之已切。詔舉拯荒之政。蠲貸兼施。敕申守土之臣。粟金並發。神倉白粲。分沾蟹舍漁莊。官庫朱提。徧逮衢童壤叟。三農食德。人人酌太極之泉。四郡熙春。處處奏長生之頌。僉曰福徵保定。用敷錫以福民。從知壽卜延洪。因推行而壽世。固已黃圖之胥慶。樂利無窮。何期丹綽之重申。滋培靡已。念彼犁扶綠野。雖穀雨之將臨。計其鎌刈黃雲。尙麥秋之未至。初開歲首。或虞上糴之艱。特布春祺。用展三期之賑。吳杭飯玉。原宿飽之有餘。越稻升香。更加餐之相勸。蒸藜炊黍。益增餉於東菑。望杏瞻蒲。倍殫勤於南畝。至於高原下隰。或疆界之相連。伏雨闌風。偶禾苗之稍涸。良農收穫。本未成災。睿慮周詳。亦周加惠。蓋惟心同天地。恐一物之或遺。所以恩逮蒼黎。寧多施而過厚。允生成之廣被。真感激之難名。臣等仰戴仁天。同遊化宇。萬年有道。恭逢八表之開。四海同春。喜

值三陽之盛。十八省皇輿之內。方欣正賦之全。蠲五百里。旬服之中。更荷鴻施之徧。渥乾坤宏造。知莫酬高厚之恩。葵藿微誠。惟共祝綿長之壽。所有感激下忱。謹合詞繕摺恭謝云云。

雲南巡撫臣譚尙忠謹奏。爲舉人重遇鹿鳴。請廣皇恩。一體與宴。以昭盛典事。竊照乾隆己酉鄉試正科。欽奉恩旨。於五十三年八月。預先舉行。茲有臨安府屬石屏州舉人賽璵。由府學附生。中式雍正己酉科鄉試。舉人曾任四川珙縣知縣。回籍以來。已經三十載。現年九十二歲。屆當本年八月。再遇舉行己酉科鄉試。該州詳請重赴鹿鳴筵宴。批司詳核前來。臣欽惟我皇上日星爲紀。雲漢作人。五十三年之雨潤風和。羣安壽宇。一十八省之珠聯璧合。共慶熙臺。茲值賓興。喜徵人瑞。如臨安府舉人賽璵者。志奮丁年。名題乙榜。宰邑而思明。試吏版。曾登歸田而勵純修。鄉評悉協。鳳輝夙覽。歲將近乎期頤。鹿宴今開。序適遇乎甲子。遴嘉辰以合衍。命宿德以偕遊。鼓瑟吹笙。令典榮符於千叟。需雲湛露。恩光願奉於萬年。臣職備監臨。心欽樂愷。切念文闡盛事。嘉溢邊隅。均因聖澤遐敷。光增斗極。所有該舉人籲請重赴鹿鳴筵宴緣由。合先據實恭摺具奏。

臣蔣賜棨等謹奏。爲恭謝天恩事。本月初六日奉旨。本日舉行耕藉。適值天氣清明。一切典禮。辦理均爲

妥協。所有執事之大臣官員人等。均着交部議敘。順天府係承辦衙門。除蔣賜棨已經賞戴花翎外。仍與吳省欽一并交部從優議敘。欽此。欽惟我皇上政治有恆。訓垂無逸。寰宇並躋夫壽域。黼黻三登。耆黎共樂乎春臺。塍畝萬井。計得酒乞漿之歲。小卯宜耕。恰佳晴旣雨之朝。元辰協筮。青旂夙駕。農祥正現。方壇黛耜。從公田畯。願勤終畝。敬治一撥。祇候三推。原隰告平。久霽流膏之澤。陰陽應敘。不需問喘之勲。播穀種以盈箱。萬箱肇慶。奏禾詞而結耦。千耦臚歡。頌至健之天行。純常益懋。仰先勞於帝力。作息毋嬉。猥承董勸之殷。得與奉鞭獻種。方切駑駘之媿。僅同掃路清塵。何意殊恩。遽叨優敘。光依日月。衍康強逢吉之籌。利溥農桑。矢明作有功之悃。邀榮逾格。循分難安。所有臣等感激下忱云云。

臣蔣賜棨謹奏。爲恭謝天恩事。竊臣於三月初六日。以兼管順天府府尹。承辦親耕藉田事宜。於耕次荷蒙皇上天恩。賞戴花翎。臣聞命之下。感激惶悚。莫可名言。竊臣世受國恩。兼司京兆。凡一切掃除供頓。本屬分所當爲。方懼辦理未周。乃於慶洽寰中之日。仰沐恩施格外之隆。金花耀首。特增異於班聯。翠羽垂纓。儼趨陪於禁近。臣雖生平夢想。而實未敢希冀。今曲荷殊恩。適如所願。歡欣無措。感戴難名。惟有竭盡駑駘。益加勤謹奮勉。以冀仰報高厚鴻慈於萬一。所有臣感激云云。